

TITUQ Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haû ahtum abyuq é asak lé chôm myit myoqbyu é yanmai, Garai Gasang hkyin yu to bâng é lumjîng hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. ² Haû ahtum abyuq é asak hkyô lé, mhaú a sê é Garai Gasang gi, ahkyíng nghu é lháng a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é dông lhoq htoq shit luí, ³ nga-nhúng é hkyi yù Sù, Garai Gasang hkunmó hkyô tô é eq rajung za, haû mungdang hko é hkyô lé ngá é loq má ap byi bê nghut ri.

⁴ Nga-nhúng chôm lumjîng é hkyô dông mai, ngá zo sîng nghut é Tituq lé laiká kê kat lhê. Íwa Garai Gasang eq nga-nhúng é hkyi yù Sù Hkrisduq Yesuq chyáng mã é jeju eq nguínón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúng suwún ayá dáng to byi râ matú nghut lhê. ⁶ Haû hpúng suwún kut râ sù gi, mara hûn râ hkyô a bo é sù; yhangmyi rayuq za wó é sù; yhang

zô pé le, agè ashop é eq jìno a gyô é ga, mara hùn râ jowò a joq é lumjìng bang nghut é sù, nghut râ lhê. ⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq dông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myit a lùm tot; ìhpê é jùn a dut; mabyoq jishùm a kut; a sansêng é ngùn hìng lé a myit ô nau é sù nghut râ lhê. ⁸ Yhang gi, byù bíng lé dat hkulùm sù; ge é hkyô lé chyitdap sù; nùm é sù, dingmán sù; chyoiyúng sù; yhumsing gùng lé wó hking é sù; ⁹ mhoq yu to bê hkyô eq rajung za, lumgíng é mungdang lé gíng gíng zuí zìng nyi é sù nghut râ lhê. Haú hkùn sheq, yhang gi, góbang lé tengmán é mhoqshit hkyô dông myit wum wó byi é eq, haú eq shai lhum é bang lé, shut é hkyô wó tùn shit râ nghut lhê.

¹⁰ Hkâsu mù gâ le, gumlau kut é bang, dangsôm taí é bang eq mhaú zô é bang myo myo nyi ri. Ahpyo-kuq hpyit é hpúng bang je riyhang myo akô. ¹¹ Haú bâng é nhut shô lé gi, xaú pyám byi râ lhê. Hkâsu mù gâ le, yhangmoq gi, a tengmán é dông sutzè lé wó yù shoq ga luí, mhoqshit a gíng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri. ¹² Kreti byù mâ é myiqhtoi rayuq lháng gi, "Kreti byu pé gi, ayang mhaú é bang, tân jung yosô dusak pé, lagôn é zo myoqnoq bang nghut akô." ga taí wú ri. ¹³ Saksé shi gi, têng ri. Haú mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, ¹⁴ haú lumjìng hkyô má gíng tìng nyi kó sháng gaq, yhangmoq lé htân

htân tân mhoqshit byî nyî aq. ¹⁵ Sâ-n-yúng bâng é matú gi, azíng zê lhunglhang sâ-n-yúng ri; a sâ-n-yúng bang eq a lumjínng bâng é matú kúm gi, haí le a sâ-n-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sâ-n-yúng dut byuq bekô nghut ri. ¹⁶ Yhangmoq gi, Garai Gasang lé sê lhê ga kôlhang, yhumsíng zui saí é loq zó dông, Yhang lé he-ngik pyâm é bang nghut akô. Yhangmoq gi, achag achyut é bang, jìno a gyô é bang eq, ge é mù joq mijoq eq a htuk é bang nghut akô nghut ri.

2

Hká Dông Nyi Yap Râ Hkyô

¹ Nàng kúm gi, tengmán é mhoqshit hkyô eq wuí é dông mhoqshit nyî râ dut lhê. ² Hpô-mâng pé lé gi, i-myit shirâm sé râ hkyô; hkungga gíng é byù dut râ hkyô; yhumsíng gùng lé wó hkâng râ hkyô eq, lumjínng myit gíng râ, chyitdap myit gíng râ, hkam jan hkyô gíng nyi râ hkyô pé lé, mhoqshit byî nyi aq.

³ Haú eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a taí râ hkyô; íhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. ⁴ Haú hkûn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsíng yhanglâng eq, yhangzô pé lé chyitdap é, ⁵ yhumsíng gùng lé wó hkang é, siri bo é, ikun lé dat wùn waq é, ge é myit wó tân shit é, yhumsíng é yhanglâng uphkan é

dông dat châng é bang dut râ matú, ge mhoqshit é hpô-myhí mâng pé dut râ nghut lê.

⁶ Haû eq rajung za, zorâm wuì lé le, yhumsing gùng lé wó hkang nyì kó sháng gaq, lhoq pun lhoq kyîng nyì aq. ⁷ Hkyô hkat hkangmó má, yhangmoq lé nàng yhang ge é muzó alik tún shit nyì aq. ⁸ Nàng lé lhom htuq htîng é bang gi, nga-nhûng é hkyô má mara a wó hûn kômù hoq hpû nyì kó sháng gaq, nàng mhoqshit é hkyô má, taî pyám râ hkyô a bò shoq, têng é, siri bo é, eq sansêng é dang taî nyì aq.

⁹⁻¹⁰ Nga-nhûng é hkyi yù Sû Garai Gasang eq sêng é mhoqshit é hkyô pé hkat hkangmó yúng nyì sháng gaq, hkyô hkat hkangmó má, jun pé lé, yhangmoq é yhumsîng wui pê é a-ô má nyì mù, yhumsîng wui é i-myit ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹ Hkâsu mù gâ le, hkungsô wó é myit myoqbyù hkyô ga é, nga-nhûng é kô myhang é Garai Gasang eq hkyi yù Sû, Yesuq Hkrisduq gi, hpungwup shingkang eq htoq shit râ hkyô lé láng nyi é hkûn, ¹² tarâ a hkunggâ é myit eq mingkan myit ô nau é hkyô koi pyám luî, shí ipyat má yhumsing gùng lé wó hkâng râ, dingmán râ eq, tarâ hkunggâ é hkyô wó cháng shoq, ¹³ nga-nhúng lé mhoqshit byi râ matú, Garai Gasâng jeju chyunghuq gi, htoq shit bê nghut mù luî, byù lhunglhang bang lé hkyi yù hkyô hpóng byi bê nghut ri. ¹⁴ Haû Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yû shoq ga, nga-nhûng é matú

Yhânggùng lé ap byî pyám bê nghut ri.

¹⁵ Nang lé ó yuq èq le, a wú shôm pyám kó sháng gaq; nang gi, ahko ahkáng banshoq eq, yhangmoq lé shí hkyô pé mhoqshit nyî aq; myit wum byî é eq, tân mhoqshit é hkyô lé le kut nyî aq.

3

Ge É Muzo Zui Sai Râ Hkyô

¹ Nang gi, lumjínng bang lé, zau wuî eq ahko ahkáng wó bâng é a-ô má nyi mù, jìno gyô nyi râ eq, hkâ-nhám le ge é muzó hkangmó zui sai râ lé hen nyi uchyang, ² ó yuq lé le lù a mù râ; ngingón hkyô hô râ; myit tê byî é hkyô tân shit râ eq; byù banshoq lé nûm é i-myit tân shit nyî kó sháng gaq, lhoq pun lhoq kyíng nyi aq.

³ Hkâsu mù gâ le, nga-nhúng le, hí hpyang gi, byù ngok pé, jìno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luí, agè ashop é eq manon lhûm é hkyô kut nyi mù, rayuq eq rayuq a jú lhûm é dông nyi lai lò bê nghut lhê. ⁴ Nghut kôlhang, nga-nhúng é hkyi yù Sû Garai Gasâng jeju eq chyttdap myit htoq shit é hkûn, ⁵ nga-nhúng yhang kut é dingmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhúng lé hkyi yù bê nghut ri. ⁶ Yhang gi, nga-nhúng é hkyi yù Sû Yesuq Hkrisduq é yanmai, nga-nhúng é ahtoq má agùn agó hut hkyó byî é Chyoiyúng Woi-nyí èq nga-nhúng lé chî san chî sêng pyám byi mù, woi-nyí má dum hku é hui nhâng luí, myit sik htaí byî é hkyô dông nga-nhúng lé hkyi yù bê nghut ri.

⁷ Haû mù luî, Yhâng é jeju mai mara hkyut san byî é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê.

⁸ Dang shí pé gi, lumgíng é dang nghut lhê mù luî, Garai Gasang lé lumjíng é bang gi, ge é muzó lé myit lòm luî rago zui saî nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

⁹ Nghut kôhlang, ana apâ ga luî taî htíng lhûm é hkyô lé le; byùxik labaû gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chûng a ge é hkyô pé nghut ri. ¹⁰ Gam hkuí é myit bò sú lé gi, í dâm mhoqshit wú mù, a wó jáng, yhang lé baú tô pyám aq. ¹¹ Haû su kut sú gi, yhang kut é muzó má mara wó to bê nghut mù, yhumsing gùng lé yhumsîng mara hun é sú nghut é lé, nàng sê to lo aq.

Je Htâng Má Pying É Dang

¹² Ngò gi, Nikopoli wà má gyoqmyò lhoq lai râ dông myit hpyit tô é yanmai, Artima lé, a nghut jáng Tuhkiku lé, náng chyáng nhang kat byi râ, jé eq yhang, nàng gi, shikut luî, haû wà shut ngá chyáng lé lô aq. ¹³ Nàng gi, tarâ sê é sú Zena eq Apolo nhik lé, yhangnhik é hkyowuì má râ é hkyô banshoq, shikut luî garúm kat aq. ¹⁴ Nga-nhúng é byu pé gi, nyí wuî râ é hkyô lé wó htuq é eq ashi zui é bang dut kó sháng gaq, ge é muzó lé myit lòm mù zui saî nyi râ hkyô lé mhoq yû râ lhê.

¹⁵ Ngò eq rahá nyi é bang yuq hkangmó gi, nang lé shi-kyâm kat akô. Lumjǐng hkyô má ngamoq lé chyt dap é bang lé, bo shi-kyám byi aq.

Garaí é jeju gi, nungmoq eq rahá joq nyi sháng gaq ô!

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee